



Inatsisartunut ilaasortaq Nivi Rosing, Inuit Ataqtigiit  
inatsisartut@inatsisartut.gl

## **Tasiilami nalunaarasuartaatitigut attaveqaqatigiinneq pillugu § 37 napertorlugu apeqquteqaammut 2026-078-imut akissut**

Ulloq: 19-06-2026  
Suliap nr.: 2026 - 9302  
Akt-id: 26479925

Asasara Nivi Rosing

Inatsisartut suleriaasianni § 37 napertorlugu Tasiilami nalunaarasuartaatitigut attaveqaqatigiinneq pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

### **Apeqqut 1. Tusassip Tasiilami atortuisa teknikikkut ajoqutaasa naammassillugit suliarineqarnissaat qulakkeerniarlugu Naalakkersuisut piffissamut qanoq pilersaaruteqarpat?**

Akissut: Nalunaarasuartaatitigut attaveqaqatigiinnermut attaveqaasersuutitut sanaartornissamut, ingerlatsinissamut aserfallatsaaliuinissamullu akisussaaffik Tusass A/S-imi, ingerlatsinissamut akuersissummik pigisaqartumi, inissisimavoq. Taamaattumik teknikikkut ajoqusernerit iluarsinissaannut Naalakkersuisut ataasiakkatigut piffissamut pilersaarusiortanngillat.

Tasiilami Tusass A/S-ip atortuinik teknikikkut ajoqusersimasunik iluarsinissamut piffissamut pilersaarutip paasinarsinissaannut ilassutissanik Tusass A/S-imut piniartoqarpoq. Tusass A/S ulloq 11. maj 2026 paasissutissiivoq: "Atortunik nutaanik pilersorneqarnissaq utaqqineqarpoq. Atortut pisariaqartut maannakkut sananeqareerput assartorneqaleruttortullu."

Tusass A/S ulloq 4. juni 2026 paasissutissiivoq pisinnaasat nalinginnaasut iluarseqqinneqarsimasut.

### **Apeqqut 2. Iluarsaassinerit qaammat ataaseq ingerlasimanerannut sordiaat patsisaappat, suliallu pilertornerusumik ingerlanneqarnissaannut Naalakkersuisut qanoq iliuuseqarpat?**

Akissut: Ajoqutinik aalajangersimasunik ataasiakkaatigut iluarsaassinissamut tunngatillugu Naalakkersuisut suliniuteqartanngillat.

Nalunaarasuartaatitigut attaveqaqatigiinnerup iluarseqqinnissaannut Tusass A/S-imi suliniuteqarnerit paasinarsinissaannut ilassutissanik Tusass A/S-imut piniartoqarpoq. Tusass A/S ulloq 11. maj 2026 paasissutissiivoq: "Nuummi imaluunniit Europami toqqorsivimmi kingoraartissanik atortussanik peqarsimanngilaq. Atortut Koreamiit iniminnerneqartariaqarsimapput. Atortut maannakkut Københavnimut tikereerput,

aammalu tunniunneqarnissaat Tasiilamullu ingerlateqqinneqarnissaat DHL-ip sulissutigaa.”

**Apeqqu 3. Tasiilami innuttaasut piffissami attaviit killilerujussuusimaneranni attaveqannginnermiluunniit attartukkaminut tamakkiisumik akiliinissaat, Naalackersuisut naapertuuttutut isigaat?**

Akissut: Piterarneranut atatillugu Tasiilami attaveqaatit annikillerujussuarsimanersut imaluunniit attaveqarsimannginnersut pillugu Naalackersuisut nammineerlutik paasissutissaateqanngillat.

Tusass A/S paasissutissiivoq Greensat-imi attaveqaat piffissaq tamaat ingerlasimasoq, taamaattumik piffissami aalajangersimasumi pisinnaasat tamarmiusut taamaallaat annikillissimallutik.

**Tasiilami pisinnaasat Tusass A/S-imiit paasissutissat 4. juni 2026-meersut naapertorlugit**

	OneWeb	Greensat	Pisinnaasat katillugit
21. – 22. marts 2026	100 Mbps miss.	1100 Mbps	1200 Mbps
23. – 25. marts 2026	200 Mbps miss.	1100 Mbps	1300 Mbps
26. – marts – 3. juni 2026	300 Mbps miss.	1100 Mbps	1400 Mbps
3. juni 2026 aallarnerfigalugu pisinnaasat nalinginnaasut iluarseqqinneqarsimapput	400 Mbps miss.	1100 Mbps	1500 Mbps

Tusass A/S aammattaaq paasissutissiivoq: ”Oqaatigineqassaaq nalinginnaasumik ataatsimoortumik pisinnaasaqarnermut sanilliullugu 100 Mbps missaannik annertussusilimmik annikillissitsineq, taannaannaq isigalugu atuisut misigisaannut annertuunik sunniinernik malitseqartussaannikkaluartoq naliliisoqartoq. Taamaattoq peqatigisaanik, piffissap aallartinnerani pisinnaasanik ataatsimoortunik annikillissitsineq – OneWeb-imi pisinnaasat annikinnerusimallutik – kiisalu piffissami atuinerpaaffiusumi artorsartitsineq pitsaassutsimut misigineqartumut sunniisimasoq, akuerineqassaaq.”

Tusass A/S-ip nassuerutigaa, teknologiit marluk taakkua, OneWeb aamma Greensat, assigiinngissutaat sullitat ilaasa misigisaannut sunniuteqarsimasinnaasooq. OneWeb-ip Greensat-imiit qisuariartarnera sivikinneruvoq. Sullitat sivikitsumik qisuariarnissaanik pisariaqartitsisimagunik, nuanninngitsunik misigisaqarsimasinnaanerannut, tamanna pingaaruteqarsinnaavoq. Tusass A/S paasissutissiivoq ajornartorsiummut matumunnga tunngatillugu Tasiilamiit sullitanik saaffiginninnerit annertumik amerleriarsimanngitsut. Tusass A/S erseqqissaavoq, sullitap ajornartorsiuteqarluni misigineranut pissutaasorpasusinnaasut aammalu ajornartorsiut tamanut atuuttoq imaluunniit ataasiakkaat ajornartorsiutaat pineqarnerisooq paasinissaanut Tusass A/S-imi sullissivik sullitanut ikiuussinnaasooq.

Nalunaarasuartaatitugut atassuteqarneq nalunaarasuartaatitigullu kiffartuussinerit pillugit Inatsisartut inatsisaat nalunaarasuartaatinut suliassaqaqfimmi atuisartut pisinnaatitaaffii pillugit maleruagassanik aalajangersaanissamut periarfissiivoq. Periarfissaq taanna maannakkut atornerqarsimanngilaq. Nalunaarasuartaatinut suliassaqaqfimmi atuisartut pisinnaatitaaffiinik, nalunaarasuartaatitugut sullissinermut

pilersuutigineqarsimangitsumut atuisuunermut akiliutip qaqugukkut utertillugu akilernerqartarnissaanut tunngavissarititaasunut tunngassutilinnik, atuutsitsisoqalissanersoq misissornissaa Naalakkersuisut ammaffigaat.

Tusass A/S paasissutissiivoq aningaasatigut taarsiissuteqarnissamik pilersaaruteqannginnerminik.

**Apeqqu 4. Tasiilami atuisunut kallarnerqartunut Tusassip aningaasatigut taarsiissuteqarnissaa akikillisaaviginninnissaallunniit Naalakkersuisut peqqussutigissavaat?**

Akissut: Atuisut aamma Tusass A/S-ip imminnut attaveqarfiginerat niuernermit tunngassuteqarpoq, Naalakkersuisut toqqaannartumik akuliuffigisinnaanngisaat.

Tusass A/S aammalu suliffeqarfimmi sullitat atuisartunut inatsimmi maleruagassat malittussaavaat. Aammattaaq apeqqu 3-mut akissut takuuk.

**Apeqqu 5. Nunatta kangiani attaveqaatit siunissamut qulakkeerniarlugit, taamaalillunilu pinngortitami pisut siunissami piffissami sivisuumi attaveqaatinik kipisoornermik kinguneqaqqunagit, Naalakkersuisut sunik suliniuteqalersaarpat?**

Akissut: Attaveqaasersuutiniq siunissamut isumannaarinissamut pilersaarusiorneq Tusass A/S-ip ingerlatsinissamut akuersissummik peqartutut akisussaaffeqarfigaa. Nalunaarasuartaatigut atassuteqarneq nalunaarasuartaatigullu kiffartuussinerit pillugit Inatsisartut inatsisaata iluarsaanneqarnissaa Naalakkersuisut piareersaleruttorpaat, tassani Tusass A/S-imut aammalu nalunaarasuartaatinik neqerooruteqartartunut allanut isumannaallisaaanermut upalungaarsimanermullu tunngatillugu piumasaqaatit annertunerulersinneqassallutik.

Tusass A/S allatigut paasissutissiivoq: "*Siunissami silarlorujussuarluni pisoqarnerani taamaaqataannik ajoquteqalernissaat aarterinaateqannginnerulersinniarlugu Tasiilami atortunik sumiiffiini illersuutissaliinissaq Tusass-ip pilersaarutigaa. Tusass-ip peqatigisaanik, atortunik allanik pissarsisinnaanerup qulakkeernissaanut, kingoraartissanut periusissiani naleqqussarpaa. Kingoraartissanut periusissiap naleqqussarneqarnerani ajoquteqalertoqassappat sukkanerusumik iluarsineqarsinnaalissapput.*"

**Apeqquut 6. Pinngortitami ajunaarnersuarni IT-mik attaveqaatinut pisariaqartunut upalungaarsimanermut pilersaaruteqarpa, taannalu Tasiilami pisumi malinneqarpa?**

Akissut: Ilassutissanik Tusass A/S-imut piniartoqarpoq, taannalu paasissutissiivoq:

*"Tusass taamatut pisoqarnissaanut upalungaarsimanermut pilersaaruteqarpoq. Upalungaarsimanermut pilersaarut pisumi tassani aallartinneqanngilaq, tassami Tasiilaq satellit-ikkut attaveqaatinik sillimmateqartinneqarmat, aammalu pisoq pisinnaasat annikillinerannik malitseqarluni. Tassani tamakkiisumik attaveerunneq pineqanngilaq."*

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga

  
Iddimangiiu Jensen Bianco